

# Klan's Geschenke-Alphabet

Text: Tom Lackner

- Prolog: Vaeate Damen, werte Herr'n, bitte leich'ng S' uns a Oa!  
Mia garantia'n, Se san danoch a Biss'l g'scheida ois davoa  
Se wiss'n jo: »Des Geg'ngtöe von Gut is Gut gemeint«  
Und »Wea soiche Freind' hot, braucht amoi gaunz sichalich kan Feind.«  
Und damit a jeda do a den Zusaummanhaung vaschdeht  
Darum bringan mia Eich unsa »Klaan's Geschenke-Alphabet«:
1. »A« schdeht fia »A-A«, womit ma höflich nua umschreibt  
Das des Geschenk, wos ma do kriagt a Ries'n-Scheißdreck is und bleibt  
»B« schdeht fia de »Blemaln«, und die kauft ma seina Frau  
Obwoi ma' büllicha im Goat'n von de Nochban fladan kau  
»C«, des wiss'ts jo eh, dass des fia »Claudia« nua schdeht  
Und waunn i ka G'schenk fia'd Menschheit bin: Na jo, daunn waaß i ned
  2. »D«, des schdeht fia »Diamant«. Den trog'ng gean de Frau'n  
Auf'm Finga, oba'd meist'n kennan nua duach'd Finga schau'n  
»E«, des schdeht fia: »Eh kloa, dass D' en Hochzeitstog vagisst  
I frog mi ealich, zu wos Du auf dera Wöhd no brauchboa bist«  
»F« schdeht fia de »Flosch'n«, die schee einpapialt san  
Oba a fia de »Falott'n«, die den Dreck vaschen'ng tan
  3. »G«, des schdeht fia »G'raff'l«, »Glumpat«, »G'schloda« und des »G'schiss«  
Des ma hot, waunn ma in so an Foi ... da Beschenkte is  
»H«, des schdeht fia: »Huach! Wo is mei Hochzeitstogsgeschenk?«  
Dess'n woa ma oba unta »E« wie »Eh kloa« eingedenk  
»I«, des schdeht fia: »Irgend a Idee in meina Not!  
Wos schenk i bloß an Mensch'n, dea jo eh scho ollas hot?«
  4. »J«, des schdeht fia: »Jössas! No a Janka! – Söwag'schdrickt«  
Dea eascht'n schiach is, zweit'ns krotzt und dritt'ns hint' und vuan nua zwickt  
»K« schdeht fia »Krawatt'n«, wo 's da d' Aug'ng außafetzt  
Oba aun dea ma si in's Pend'l hau'n kaunn zu guada Letzt  
»L«, des schdeht fia: »Leida hob Dei Geschenk ned 'kriagt«  
Eine Ausred', de hoit bledaweis' nua söt'n bei wem ziagt
  5. »M«, des schdeht fia »Morgengabe«. Und wea die schtoaniat  
Kau jo schau'n, wia guat a nocha in da Bodwaunn' schlof'm wiad  
»N«, des schdeht fia »Nodich« und fia »Na! Ned No a Trum!  
Dea gaunze Raumsch liegt eh nua sinnlos in dar Wohnung umadam«  
»O«, des schdeht fia »Oaschgeschenk« und »Oiss, wo Da mid G'woit  
Auf's Aug 'druckt wiad und wos D' daunn höech'In muasst, wia sea's da g'foit«
  6. »P«, des schdeht fia »Palmersmünz'n«, de ma gern vaschenkt  
Damit an jo die Mali-Tant' im Testament bedenkt  
»Q«, des schdeht fia »Quölarei« beim Shopping im Advent  
Wo ma boid vua lauta Leit' de eig'nan Fiaß' nimma dakennt  
»R«, des schdeht fia »Rumm'l«, »Remassuri«, »Ring'lschbüh«  
In da schdillst'n Zeit – des braucht ma fia r a echtes Weihnochtsg'föh
  7. »S«, schdeht fia de »Schdülle Nocht«, die ma laut und und foisch darsingt  
Zu dem Behuf, dass an des Christkind a de richti'ng Soch'ng bringt  
»T«, schdeht fia den »Trauring«, dens D' noch Möglichkeit graviast  
Nochdems D' den Nauman von da eascht'n Gattin vuahea ausradiast  
»U«, des schdeht fia den »Umtausch«, und fia den is 's meist'ns z'schbot  
Waunn die Resitant' die Rechnung fia de Sock'ng g'fund'n hot
  8. »V« schdeht fia »Vasüwa doch des oide Canapé  
Wos da die Oma letzt'ns g'schenkt hot, bei da Tante Dorothee!«  
»W«, des schdeht fia »Weabekug'lschreiba«, wos ned schreibt  
Und fia des »Weabefeizeig«, wos meist'ns koid und finsta bleibt  
»X« schdeht fia den »Xoitz'nan Preis«, den man mit Mühe brennt  
Fia r a Geschenk, des ma im Wintaschluss um D' Hööfte kria'ng kennt
  9. »Ypsilon« schdeht fia den »Yeti«, dea ma ollas zoit  
Und dabei glaubt, dass ma sei Watsch'ng'sicht desweg'ng bessa g'foit  
Und zum Abschluss ein Begriff, dea olle aunda'n inkludiat  
Und dafia soagt, dass aus dea List'n eine runde Sache wiad. (Weil:)  
»Z« schdeht in da Fochschbroch fia de »Zache Zahrarei«  
Und von »Alcohol« bis »Zwetschg'ngkrampus« is do oiß dabei.